



册府元龟

卷之百三十九  
至四十



13
849
49



13  
849  
49



冊府元龜

淮南李嗣京參閱

西極文翔鳳訂正

豫章黃國琦較釋

帝王部

一百三十九

旌表第三

唐中宗神龍元年詔曰魏州人故楊初成往者運屬  
殷憂志懷忠謹將迎六飛之駕奄罹五刑之罰身既  
伏誅家又從坐言念誠節深可哀矜宜有褒榮式旌  
忠順可贈左驍衛左一府郎將初成魏州人垂拱中

僞稱卽將於東都市宣勅募人欲迎帝於房陵事覺坐斬籍沒其家至是旌表焉又故司空太子太師英國公李勣往坐其孫敬業構逆毀廢墳塋至是帝思其佐命功追復官爵命所司爲起墳改葬

三月以故司僕少卿徐有功執法平恕追贈越州都督仍遣使就其家吊祭令所司與一子官

二年十二月贈廬州刺史朱敬則秘書監褒異行也敬則亳州人嘗與三從兄同居四十餘年財物無異三年六月乙亥旌表江夏潘元祚門閭以其居喪結廬墓次負土成墳也

睿宗唐隆元年六月下詔曰故許州司兵燕欽融先陳忠讜頗列章奏雖干非其位而進不顧身末言奄忽誠可傷悼方開諫路宜慰窳窳可贈諫議大夫仍令備禮改葬初景龍四年欽融以帝后干政連上疏切諫帝氏等大怒勸中宗召之欽融因而致死帝踐祚以其言多切三下制贈焉

郭夔定州人也亦備諫帝氏帝氏又勸杖殺之帝卽祚甚加傷悼贈諫議大夫

又制曰慎終追遠斯乃舊章表德旌賢有光嘗策故中書令裴炎含和稟粹履信居貞望重國華才稱人

秀惟幾成務績宜於代工偶俱無猜義深於奉上文明之際王室多虞保乂朕躬實著誠節而危疑起豐倉卒罹災歲月屢遷丘封莫樹永言先正感悼良多宜追賁於九原俾增榮於萬古可贈益州大都督先是永淳中太后臨朝武承嗣請立武氏七廟中書令裴炎進諫太后不悅而止後崔燦上言炎有異圖胡元範符儼皆明其無罪太后不納令斬于都亭驛前故有是贈

七月册立皇太子大赦天下日神龍已來直諫在遭非命咸令封植其墓又追贈故帝月將為宣州刺史景雲二年八月追贈故滑州常城縣尉張仲之為饒州長史旌義烈也

玄宗即位下制曰以忠報國典册所稱感義捐軀名節斯在故右羽林衛大將軍上柱國遼陽郡王李多祚三韓貴種百戰餘雄席寵禁營迺心王室挺茲誠信翻陷誅夷賴彼神明重覆姦慝永言徽烈深合褒崇宜追歿後之榮以復生前之命可還舊官仍宥其妻子多祚初為右羽林將軍節愍太子之舉兵也令多祚率衆先至玄武樓下異帝聞以誅三思之意竟案兵不戰俄為左右所殺時年五十餘是日并其二

子壻併命焉妻子並從籍沒至是追復又下制曰故蘇安暉文學其身鯁直成操往年抗疏忠謹可嘉屬回邪擅權奄從非命興言軫悼用惻于懷宜贈寵章式旌徽烈可贈諫議大夫仍宥其妻子安暉中宗時以事連節愍太子被殺故旌之

先天二年七月詔曰太平公主子薛崇簡執心奉國勵節忘私早辯忠邪每有規諫因被嫌疑加以鞭笞事不見從忠實可紀宜甄逆順復其官爵仍賜姓李太平公主謀逆諸子皆伏誅唯崇簡以先諫公主屢被鞭撻故得賜姓官爵如故

是歲有司奏孝子王知道母患骨蒸醫云須得生人肉食之知道遂密割股上肉半斤許加五味以進母母食之便愈即託他疾卧不令母知州縣以狀聞宰相請賜束帛帝曰宜與一官以旌孝行是年江西道按察使上言東陵人唐君祐喪母哀感鄉曲廬於墓側有芝草三莖生焉長沙人嚴待少為祖母所養祖母死居喪三載負土成墳手植松檟百餘株澧陽人張仁興五代同居其家堂後生一草彩色甚茂並有勅旌表門閭

開元二年正月乙酉制曰崔玄晞張柬之等徃以神

龍之初保又王室奸臣所忌譴居炎海流落變衰感  
激忠義玄晞嗣子吏部郎中璩清才雅韻靜守專直  
東之嫡孫忠祖考繼歿遺孤可傷彼勲業之下淪佇  
名賢之必復是得景倩而悲仲宣者也高祖封樂毅  
之後武帝求蕭何之裔斯不遠哉昭於德義緬懷前  
烈宜加後命璩並可朝散大夫

二月乙亥以徐有功之子日倫自大理司直為恭陵  
令勅曰其父昔為理官時密刑網遂能堅守忠直每  
抗回邪海內稱其不寃朝廷賴其惟恤永言種德必  
歸餘慶宜甄嗣子俾勸群臣

十月帝以王海賓單騎赴難勇冠群帥及臨洮之役  
輕敵致陷身歿功存誠節尤著乃詔贈左金吾衛大  
將軍賻物三百匹米粟三百石喪事並官供命紫微  
舍人倪若水吊祭仍與一子五品官下制曰盤予赴  
敵義光忠壯免胄捐軀情殷悼惜故防禦群牧使豐  
安軍使右衛率府率王海賓七卒楨幹萬里長城抱  
鐵石於胸襟運韜鈴於掌握屬犬羊為寇牧圉罹災  
出車徇其征討躍馬先其掩襲挫彼鋒銳殲厥渠魁  
克國持邊佇終文略建威臨陣忽喪驍雄興言震慄  
思有褒美宜加大將之禮兼茂后昆之秩

四年十一月黃門盧懷慎卒明年帝於城南望見懷慎別業方設大祥齋帝憫其貧困歎息久之下詔曰故銀青光祿大夫簡較黃門監上柱國范陽縣開國伯贈荊州都督盧懷慎衣冠重望廊廟周材訐謨當三傑之一學行惣四科之二等平勃之輔漢同季文之相魯質隣於古儉實可師雖清白燕翼籛金非寶然妻孥貧窶擔石屢空言念平昔彌深軫悼宜恤凌統之孤用旌晏嬰之德宜賜其家物一百段米粟二百石因制中書侍郎蘇頌爲之碑文仍親禮焉

六年十二月以鄂州人潘元祥屢辭弓旌獨守墳墓行能勵俗學可爲師拜左拾遺內供奉仍直左春坊侍皇太子讀書

十一年行幸北都太原人趙栖桐隱居有道年暮羸痺詔就其私第拜著作郎仍聽致仕賜帛五十疋十四年宋州奏單父人劉九江三代同居有慈烏巢于庭戶鄉里榮之名其鄉曰邕睦鄉里曰同居里請旌表其門許之

是年鉅州鹿泉人李慶恭張義貞青州北海人呂元簡定州鼓城人彭思義及蔡州孝女楊氏等並以孝義聞著旌表其門處恭與義貞異姓同居於今三代

凡百餘年元簡四代同居所食六畜皆異母同乳思義居喪至孝廬於墓側有嘉禾生及白兔馴擾

十五年九月制曰故益州長史張守潔故桂州都督員嘉靜等並授委潘鎮克著勤勞奄隨化往良深震悼言念旅襯猶在遐方用加優恤以慰泉壤宜官造靈輦給傳還鄉所緣葬事並委有司支給是歲華陰人韓思訥六代同居特旌其門

二十年三月以右驍衛將軍同正員安金藏忠節見於先朝特封爲代國王仍於東嶽西嶽等鑄碑勒其名制曰義不辭難忠爲令德保祐君主安固邦家則

必荷寵光之休庸土宇之錫安金藏忠義奉國精誠事君徃屬酷吏肆兇潛行謀搆當疑懼之際激忠烈之誠突亦刻心保明先聖見危授命沮奸邪之慝轉禍存福獲明夷之貞雖鳴玉銜珠已備於休命而疇庸疏爵未洽於殊榮宜錫寵於珪組兼勒名於金石二十三年三月河北採訪使張守珪奏相州湯陽縣有孝子石佺奴請旌表門閭許之佺奴三歲喪親廬於墓側凡二十餘年塋內有枯樹重生枝葉群鳥馴擾鄉里咸敬異之

閏十一月相州又奏孝子石佺奴塋內有寒竹抽筍數十枝望旌表

其門以章孝理許之



二十四年制曰貴德尊賢飾終念往此聖人所以理天下厚風俗也王友貞稟氣元精遊心太朴孝惟不匱獨貫於明時道則難名高謝於人代言念錫顛方期化俗遽爾凋殂良深愍悼生無大位雖隔外臣之儀沒有餘榮宜贈上卿之服可贈光祿大夫仍令州縣長官吊祭友貞長安人歷位長水縣令後罷歸田里中宗在春宮召爲司議卽不就神龍初又拜太子舍人仍令所司以禮徵赴乃以疾辭制曰敦夷齊之行可以激貪尚顏閔之道用能勸俗新除太子中舍人王友貞德義泉藪人倫茂異孝愛始於事親忠信

表於行已富在文史蕪於財貨久歷官掌累聞課績有古人之風保君子之德乃抗志塵外棲情物表深歸解脫之門誓守薰脩之誠須加徵命作護儲闈固在辭榮陳情懇至朕方崇獎蕪退懲靜澆浮雖思廊廟之賢豈違山林之願宜加優秩仍遂雅懷可太子中舍人員外置給全祿以畢其身任其在家脩道仍令所在州縣存問四時送祿至其任所帝在東宮又表請脩禮徵之以年老竟辭疾不赴是歲九十餘卒故有褒贈

二十五年五月己亥京兆人張阿九母疾阿九割股

肉饋之厥疾遂愈先是同郡趙言亦以割股養母聞帝嘉之賜阿九及言物各五十段以旌孝行

天寶四載二月京兆府奉天縣人趙正言母病割股肉以餌母疾瘳賜物五十段以資孝養華原人韓難陀父亡廬於墓側凡十六載金城女董氏家無兄弟孝養不嫁父亡廬於墓側凡六載並表其門閭賜以粟帛

三月陳留郡封丘人楊嵩珪母亡負土成墳於所居別立靈几畫父母形貌享祀十有餘載尉氏縣人楊思貞父亡廬於墓三十八載有芝草白兔甘露等瑞

並賜粟帛旌表門閭

四月冀州人燕遺倩既孤於堂中刻木爲父母形象施帷帳衣服如存朝夕奠祭鄉閭甚敬異之

蜀郡人郭景華孝行過人父喪明景華晝夜啼泣宅中忽湧甘泉因以洗目漸明東陽郡人應先父亡廬於墓側有芝草連理樹生並旌表門閭以昭孝行十五載袁光庭爲伊州刺史祿山之亂西北邊戍兵入赴難河隴郡邑皆爲吐蕃所拔惟光庭守伊州累年救不至虜乃百端誘說終不降屈部下如一及矢石旣盡糧儲並竭城將陷沒光庭手殺其妻子自焚

而死朝廷聞之贈工部尚書

王君奭判涼州都督為吐蕃所殺帝甚痛惜之制贈特進荊州大都督給靈輿遽歸京師葬事並官給賻物三百段粟三百斛仍令鴻臚卿一人充使監護

韓思復睿宗朝為給事中活嚴善思於雷霆之下拒武三思於諂附之中帝御筆題碑云有唐忠孝韓長公之墓

肅宗至德二年二月大赦詔曰賊陷兩京文武嘗參官及諸州刺史有絕脰仰藥不事叛人為眾所知者量加優贈十二月詔曰忠臣事君有死無貳烈士徇

義雖滅猶存其李愷盧奕顏杲卿袁履謙許遠張巡

張介然蔣清龐堅等即與追贈

臣欽若等曰自李愷以下並為安祿山亂死

王事也

三年正月詔内外文武官陷在縣中潛藏不出或託疾不仕忠節可嘉並與成考

是月京兆尹李峴奏奉天縣百姓滑清泌父茂先疾亟清泌割右股肉方圓二寸與父食之病乃痊詔清泌宜與官以旌孝道

二月詔天下州縣有遭逆賊攻擊堅守不下竟以獲全其官人百姓中有誠効灼然為眾所知者宜令本

道使案驗奏聞據狀迹酬其官賞身亡沒者重加褒贈有父母存者仍與一官及邑號無父母者與一官如有一家丁壯盡被屠害其父母妻子仍令州縣以官物賑恤并量造舍宇使得安存

乾元二年北庭行營使李嗣業自正月與諸將同圍相州是時築隄引漳水灌城經月餘城不拔時軍無統帥諸將各自圖全人無鬪志賊每出戰嗣業被堅衝突屢鋒刃亦爲流矢所中數日瘡欲愈卧於帳中忽聞金鼓之聲因而大叫瘡中血出數升注地而卒帝聞之痛悼而嘆惜之下詔曰臨難亡身爲臣之大

辭念功加贈經國之章典故衛尉卿兼懷州刺史充北庭行營節度使號國公李嗣業植操沉厚秉心忠烈懷幹時之勇略有戡難之遠謀久仕邊陲備經任使自兇渠構亂中夏不寧持感激之誠摠統果之衆親當矢石頻立勲庸壯節可嘉將謀於百勝忠誠未遂空恨於九泉言念其功良深憫悼死於王事禮有可嘉宜增裂土之封用廣飾終之義可贈武威郡王其賜贈及緣葬事所司倍於章式仍令官給靈輿還所在以其子佐國襲其官爵實封二百戶代宗寶應元年鳳翔天興人楊播隱居以孝行旌表

門閭一云播登進士第隱居不仕玄宗徵爲諫議大夫棄官就養以孝行禎祥表其門閭肅宗就加散騎掌侍賜號玄靜先生初播父哲以孝行有異旌其門閭後播子炎爲起居舍人辭祿就養岐下丁父憂廬於墓前號泣不絕聲有紫芝白雀之祥又表其門閭孝著三代門樹六闕焉

八月梁州刺史臧希讓上言南鄭縣百姓李貞古孝行彰聞請付所司旌表從之貞古六歲而孤母欲改嫁貞古雨泣留之母遂守志母未食寢貞古不食寢及母亡負土成墳廬於墓側有猛虎馴於廬前白鼠見於墓門村人異之

永泰元年正月京兆尹第五琦奏奉天縣竇昇朝二女伯娘仲娘雖長於村野而幼有志操住於邠州接界草賊數千人持兵入其村落行剽劫聞二女有容色姊年十九妹年十六歲藏於巖窟間賊徒擬爲逼辱乃先曳伯娘出行數十步又曳仲娘出賊相顧自慰行臨深谷伯娘曰我豈受賊污辱乃投身於谷賊方驚駭仲娘又投於谷谷深數百尺姊尋卒仲娘脚折首破血流被體氣絕良久而蘇賊義而去琦感其貞烈奏之詔旌表門閭仍長免丁役二女葬事官

給京兆戶曹陸海首賦詩以美之  
三月河南等道都統黃門侍郎同中書門下平章事  
王縉奏徐州處士皇甫暉養母以孝聞請旌表門閭  
許之

是月追贈故徐州蘄縣令李瀾瀾弟渤等官先是東  
都未平梁宋間群盜連聚或至二千餘衆攻陷城邑  
瀾守蘄縣力屈爲盜所執將害之瀾弟渤詣盜請代  
兄死瀾又請殺身買弟兄弟爭死俱爲盜害瀾女原  
武尉盧甫妻也見父被執號泣請代死亦爲盜所害  
宣慰使吏部侍郎李季卿以節義聞有尉氏尉王泛

妻裴氏儀王傳臣卿之女也素有容範爲賊所俘賊  
逼之裴曰吾衣冠之子當死即死終不苟全一命受  
污於賊賊惜之臨之以兵逼之以力裴堅罵抗之賊  
怒乃支解裴氏至死不屈季卿亦以狀迹聞詔曰鄭  
州原武尉盧甫亡妻李氏汴州尉氏尉王泛妻裴氏  
等懿範傳家柔明植性頃因寇難克彰義烈或請代  
父死表因心之孝或誓逐夫亡標難奪之節宜膺贈  
飾俾光休美李氏可贈孝昌縣君裴氏贈河南縣君  
仍編入史冊瀾渤亦贈官秩

二年六月賜安南節婦金氏兩丁侍養金氏本賊帥

陶齊亮之母以忠義訓齊亮不受遂與齊亮絕自績而衣自田而食州里稱之仍詔本道使每季給銀二兩并衣服以終其身

大曆四年二月左千牛薛鋒母病割股肉啖母病愈詔下有司旌表門閭

三月睦州司士參軍許利川居母喪以孝聞有芝草八莖及連理樹一株產於墓廬詔旌表其門閭

六月詔曰武德貞觀之間有若魏徵王珪李靖李勣房玄齡杜如晦等扶翼大運動勞王家尊主庶人匪躬致命咸有一德格于皇天緬然長懷風烈猶在其

後嗣沈翳特加優獎如廟宇荒毀即宜脩葺無德不報何日忘之

六年十月邛州上言依政縣百姓樊漪居父母喪負土成墳廬於墓側有兔鵠馴擾木連理慈竹自生詔旌表門閭

七年七月鎮州上言鼓城縣人陳岷居父喪被髮廬於墓側不掩墓門哀毀過禮望旌表門閭許之

十一月京兆府上言櫟陽縣人董思寵五代同居子孫凡八十餘人友愛敦睦鄉里稱之天寶末寇盜剽掠村閭此家獨全年遭水旱此家獨免至於征稅每

先於人伏望旌表門閭編諸史冊許之

八年十二月江南西道觀察使路嗣恭上言信州弋陽人張球父歿五年廬於墓側哀毀過禮墓門塼土生芝草七莖有鵲巢于墓之叢竹請旌表門閭許之九年二月庚辰追贈故河西隴右副元帥都知兵馬使秦州刺史郝廷玉爲工部尚書錄勲也

四月追贈故平盧節度使柳城郡太守劉正臣爲工部尚書正臣本名客奴初祿山叛逆正臣越海遣使奉順帝錄其誠節故寵之

德宗建中元年十一月詔故侍中平陽郡公贈秦州

刺史敬暉重贈太尉故吏部尚書漢陽郡公贈中書令越州刺史張柬之贈司徒故侍中扶陽郡公贈兗州刺史桓彥範贈司徒故中書令博陵郡公贈幽州刺史崔玄暉贈太子太師故中書令南陽郡公贈洪州刺史袁恕已贈太子太傅故中書令贈荊州大都督張九齡贈司徒故中書令越國公鍾紹宗贈太子太傅時以國朝將相雖嘗贈而未稱者再贈之故有是命

二年三月代州刺史贈太子太師賈循重贈太尉并妻子皆備禮改葬故朔州刺史贈華州刺史姚閭重



贈潞州大都督與其子一人官皆以死王事也

五月以澤州人雍先五代共居表其門閭

七月贈故伊州刺史袁光庭工部尚書初光庭守伊州虜圍之連歲不能拔及力竭將陷先亦其孥而自焚死焉

三年二月贈故成德軍節度判官簡較司封郎中兼御史中丞邵真戶部尚書與一子五品正員官真嘗爲李寶臣掌文翰深所信任寶臣死其子惟岳僞領父衆李正已田悅欲其同反各通使於惟岳真泣諫曰先公位兼將相受國厚恩大夫縲絰之中遽欲違

命同隣道之惡背先公之志不可田悅與我密邇絕之恐速禍正已稍遠絕之易耳但令悅使還報請徐思其宜執正已使于京師因請致討朝廷必嘉大夫忠而旌節可得若受節於正已卽當臣之爲之奈何惟岳許之令真草奏將發孔目吏胡震頗任事言於惟岳曰此事非細請與諸將吏議之至會議其鎮州刺史畢華曰先公與二道親好二十年一朝背之不可今執其使送京師大善脫未爲朝廷所信正已兵疆忽來襲我孤軍無援何以敵之不若仍舊勿絕徐觀其變惟岳又從之真又勸惟岳遣其弟惟簡入朝

仍遣軍吏薛廣嗣詣河東節度馮燧軍請從順屯兵  
東鹿田悅聞其謀使使謂惟岳曰卻真惑亂軍政必  
速殺之不然吾且自討其罪矣惟岳懼遂殺之故有  
褒贈

四月贈故右僕射褚遂良太尉

五月詔曰故河西兼伊西北庭節度觀察使簡較工  
部尚書兼御史大夫贈太子太保楊休明故河西節  
度觀察使簡較工部尚書兼侍御史大夫周鼎故西  
州刺史兼御史中丞李秀璋故瓜州刺史兼御史中  
丞知河西節度留後張銑或寄崇方鎮或攝摠留務

時屬殷憂並抗貞節率屬將吏誓一其心固守西陲  
以俟朝命羗戎乘間驟逼城池國家方有內虞未遑  
外救河隴之右化爲虜場俾我忠良歿身異域彌歷  
年紀以逮于茲旅柩方旋誠深憫悼故遽加寵贈俾  
極朝榮式彰茂烈永賁幽壙休明可贈司空鼎可贈  
太保秀璋可贈戶部尚書銑可贈兵部侍郎休明等  
自至德後陷沒於吐蕃至是其族各以其柩至故加  
褒贈休明男燁并將較等追贈者十餘人仍官爲殯  
葬

八月太子賓客第五琦卒琦之子峯峯婦鄭氏女皆

以孝著旌表其門

四年二月將作藍田昂亡母亡姨亡妻汾州刺史李再春亡妻其子瑤亡妻等並追贈國夫人昂瑤亡子亡女皆贈官封初昂再春瑤棄其族來降田悅盡滅其家少長無類瑤至京師授左監門衛將軍再春爲汾州刺史兼寵贈其家

三月贈故淮寧軍都虞侯兼御史大夫實封一百戶周魯太尉益實封二百戶故許州鎮遏兵馬使兼御史中丞實封五十戶王玠司徒益實封一百五十戶故淮寧軍兵馬使兼御史中丞實封五十戶呂從貴

左僕射益實封一百戶故十將試太宰卿康秀琳右僕射益封一百戶故節度押衙監察御史裏行姚愔兵部尚書賜實封二百戶故十將試太子賓客梁興朝戶部尚書賜實封一百戶故十將試太常卿賈櫟卿刑部尚書賜實封一百戶故試太宰卿侯儉工部尚書實封一百戶命散騎常侍蕭昕往汝州境上以禮致祭并委李勉哥舒曜訪其家以名聞有子者得回父官爵子孫三代過犯者減一等論以淮寧軍節度押衙試殿中監常清爲太子賓客兼御史中丞封安定郡王賜實封一百戶其周魯等所賜實封可

載於典冊傳其子孫初希烈怒哥舒曜將汝州令周  
魯等以兵三萬來擊曜魯玢憺清等自號四公子因  
希烈之親吏梁銳動靜輒馳告勉至是魯乃謀於周  
志欲廻軍據蔡州王玢應於許州姚憺帝清君中殺  
希烈議定密令奏之且請毒藥以寘其食得陳藥一  
丸無效魯等以故久不發初希烈令養子十人從魯  
魯次襄城欲行其志養子等知其謀亡告希烈乃使  
其將李克誠率驟軍千人攻殺魯等而收其兵復殺  
玢憺等始帝清約事洩無得相引清以故幸免然終  
懼不得脫乃說希烈曰今兵寡勢弱不足以集事請

與朱滔使宋少直詣滔乞師希烈信然遣之夜次襄  
邑境乃奔歸劉洽希烈聞魯等有變兵亂乃閉壁數  
日鄭州尉氏賊亦惶駭奔去希烈乃上疏歸罪魯等  
率兵還保蔡州

是月又贈故衛尉卿兼御史中丞顏杲卿司徒故韋  
山郡太守袁履謙左散騎韋侍故許州長史龐鑿右  
散騎韋侍故鞏縣主簿蔣清禮部侍郎并錄其子孫  
履謙妻封氏封申國夫人

也

臣欽若等曰自顏杲卿已  
下並為安祿山亂死王事

又贈故右驍衛將軍代國公安金藏兵部尚書授其

子承恩銀青光祿大夫試殿中監兼廬州長史  
四月贈故禮部尚書李之芳亡女隴西郡夫人初李  
克誠既陷汝州殺掠居人士女賊至李氏家李氏恐  
逼辱遂投井死

八月贈曹孝昌左僕射實封二百戶孝昌李希烈之  
將孝昌以隨州降尋爲其將康叔夜所殺復叛故有  
是贈

十月贈左龍武大將軍呂希倩太尉賜實封三百戶  
子孫不絕官爵又贈將軍高仲傑司空實封三百戶  
子孫不絕官爵初帝避難於奉天朱泚之賊於城東

西南三面踰城渾瑊率招召突將三百人分道連戰  
翼日辰時殺傷太甚賊力屈而退希倩死之俄賊復  
攻城仲傑力戰而死故有是贈仍官給棺襯衣服遣  
宰臣宣旨致祭

興元元年二月帝在奉天詔曰見危致命之謂忠臨  
義有勇之謂烈惟爾克勵臣節不憚殺身惟朕式嘉  
乃勲懋昭大典日台不德罔克若天邁茲殷憂變起  
都邑惟爾卿士嗷然靡依逼畏所加淄澠共混故開  
府儀同三司簡較禮部尚書司農卿上柱國張掖郡  
王段秀實操行嶷立忠厚精至義形於色勇必有仁

頃者嘗鎮涇原克著威惠叛卒知訓咨爾以誠賊泚  
藏姦欺爾以詐守人臣之大節洞元惡之深情端委  
國門挺身白刃誓碎兇渠之首以敵君父之讐視死  
如歸履虎致啞噫天未悔禍事乖垂成雄風壯圖振  
駭群盜昔王蠋守死以全節周顛正色而抗詞惟我  
信臣無愧前哲聲聞寰宇義冠古今足以激勵人倫  
光昭史冊不有殊等之賞孰表非嘗之功爰議疇庸  
特超簡限著之甲令樹此風聲可贈太尉謚曰忠烈  
宣行史官仍賜實封五百戶莊宅各一區長子與三  
品正員官諸子並與五品正員官仍廢朝三日收京

城之後以禮葬祭旌表門閭朕承天子人臨馭億兆  
一夫不獲則予之辜况誠信不達屢致寇戎使抱義  
之臣陷于凶逆有臨危致命歿而愈彰有因事成功  
權以合道苟利社稷存亡一致酬報之典豈限嘗員  
並委所司訪其事跡續具條奏當加褒異錫其井賦  
圖形雲閣書功鼎彝以彰我有服節死誼之臣傳于  
不朽是月又贈故商州刺史謝良輔左散騎嘗侍初  
涇原兵亂京師後數日商州團練兵亦作亂害良輔  
焉及此追贈

四月贈故吏部郎中郭雄同州刺史詔曰朕越自邦

畿至于梁漢而庶尹卿士各勤其職雄以鋒刃之下  
舍卒遇害親戚阻絕孤魂何依豈不以予一人不德  
而使子大夫罹其禍也永言惻惻增軫於懷爰申寵  
贈俾如尊典

六月故神策京西兵馬使簡較工部尚書兼御史大  
夫楊惠元贈右僕射仍賜絹百疋惠元男故尚食奉  
御晟贈殿中監故左衛兵曹參軍嵩贈邠州刺史褒  
死難也惠元以兵屬李懷光建中四年冬自河朔回  
赴國難解奉天之圍明年四月懷光既圖叛逆惠元  
義不愛汗脫身奔竄至奉天會乘輿南幸李懷光怒  
惠元之逸令其將冉宗以百餘騎追及於好畤縣惠  
元計窮父子三人並投人家井中冉宗並出而害之  
及是各加追贈焉

是月給事中孔巢父往河中宣慰李懷光遇害帝聞  
而驚悼久之贈尚書左僕射賜其家布帛粟米甚厚  
仍授一子正員官收復河中日所司備禮葬祭之  
七月詔曰贈太尉段秀實天授貞烈激其頽風蒼黃  
之中密蘊雄斷將舒國難詭收寇兵撓其兇謀果集  
吾事挺身徑進奮擊渠魁英名凜然振邁千古宜差  
官致祭并旌表門閭緣葬所要一切官給仍於墓所

官為立碑以揚徽烈諸軍將士有身死王事委本使具名銜聞奏即與褒贈

又贈故左驍衛大將軍樂平郡王劉海賓太子太保

追贈實封一百戶

臣欽若等曰海賓事其後

八月詔贈太尉段秀實宜令所司即與置廟立碑

九月贈故涇原都知兵馬使試大嘗卿何明禮兵部

尚書故推官試晉州別駕岐靈岳贈同州刺史旌死

節也初段秀實與劉海賓及明禮靈岳潛與約剋期

誅朱泚事洩皆遇害故有斯贈

十月以前太嘗卿蕭定為太子少師前大理卿蔣沈

為右嘗侍前秘書監程鎮之為太子賓客並以陷賊

不仕褒之也

十二月以前祠部郎中王礎為比部郎中前起居舍

人鄭南史為司封員外郎前工部員外郎史官脩撰

荀尚為駕部員外郎前左庶子張蔭為彭州刺史礎

等並朱泚時潛不仕也

貞元元年正月詔曰君臣之義生錄其功沒厚其禮

况才優任國忠至滅身朕每興歎勞於寤寐故光祿

大夫守太子太師上柱國魯郡公顏真卿器質自天

公忠傑出出入四朝堅貞一志屬賊臣擾亂委以存



諭拘脅累歲死而不撓稽其盛節寔謂猶生朕致移  
斯禍慙悼靡及式崇嘉命兼延爾嗣可贈司徒仍賻  
絹帛五百端米三百石男頽碩等至喪制終後所司  
聞奏超授官秩時李希烈陷汝州宰相盧杞奏顏真  
卿使諭之既爲所迫不從遂縊殺之

四月加朔方將石崇憲簡較工部尚書來重隨簡較  
太子詹事兼御史中丞初馬燧渾瑊統兵討李懷光  
懷光俾部將徐光將數千衆保長春宮復俾石崇憲  
將驍兵援徐光崇憲以數千騎來降懷光遂屠其家  
故加官

九月贈朔方節度都虞侯呂鳴岳工部尚書鳴岳前  
欲圖李懷光以從順事洩爲懷光所殺故追贈焉

十一月贈朔方邠寧節度兵馬使兼御史大夫石演  
芬兵部尚書仍賜錢三百千演芬本西域胡人以武  
勇爲朔方節度李懷光養子以至右武鋒都將時懷  
光軍屯三橋將與朱泚通謀演芬乃使食客郤成義  
密疏具言懷光反狀請卽罷其總統成義至奉天乃  
反以其言告懷光子唯唯密報其父懷光乃召演芬  
責之曰我以爾爲子柰何欲破我家耶今死可乎演  
芬對曰天子以公爲腹心公以演芬爲腹心公上負

天子安可下責演芬且演芬胡人不解異心欲守死以事一人幸得免呼爲賊死當分也懷光初使左右鬻食之皆曰此忠烈之士也可令快死乃以刀斷其頸至是上念其義烈故加追贈

二年十月以前淮西行軍司馬簡較左庶子兼御史中丞呂仲容爲刑部郎中前潞州刺史張應爲吉州刺史仲容應皆陷李希烈受其僞署官數有章表陳賊中事宜帝每嘉歎及希烈平徵至特加賜賚而命官焉

三年四月贈故淮西節度使簡較工部尚書兼御史大夫陳仙奇太子太保賻布帛粟米有差喪事官給仙奇起於行間性特忠果自李希烈死頗竭誠節而吳少誠輩十數大將素兇悖醜正遂結黨害仙奇焉閏五月朔方河中副元帥渾瑊與蕃相尚結贊會盟於平涼瑊與副使兵部尚書崔漢衡監軍特進宋奉朝等皆入幕次結贊伐鼓三聲其衆呼譟而至瑊遽出自幕後偶得他馬奔歸奉朝爲亂兵所殺六月贈奉朝開府儀同三司右衛大將軍以死王事也十一月彭城李子尹務榮喪親廬於墓側六年有芝草之祥詔旌其門閭

五月建州奏邵武縣人黃天喪母廬於墓側有紫芝生詔旌其門閭

五年二月潤州奏句容人張暉洧居父喪孝行著聞詔旌表其門閭

八年閏正月贈故御史中丞張巡妻隴西郡夫人李氏申國夫人帛百疋追舊勲也

臣欽若等日  
巡事具前

十二年七月宣武軍節度李萬榮病疾署其子迺為兵馬使迺殺大將伊婁浣張伍倉官劉叔向等大將鄧惟恭等執迺送京師詔浣等三人委中書門下即與追贈仍各與一子八品正員官

順宗以貞元二十一年正月即位六月詔曰前昭義軍泗州營衙前兵馬使大中大夫試太子賓客兼監察御史張重政門有勲力性推毅勇夙聞克家之美嘗稱撫衆之才近者其父初亡群小扇惑誘以竒計俾執軍麾而重政與其母兄號泣固拒遂全懇願奔告元戎不為利回成其先志於家為孝子在國為忠臣軍郡又安行義昭著念茲名節感歎良深宜洽恩榮俾弘激勸禮無辟於金革理當申於權奪戎章憲府式宗蕪學可起復雲麾將軍守左金吾衛大將軍員外置同正員簡較太子詹事兼御史中丞仍委准

南節度使與要職事任使重政泗州刺史伍之子伍在州十餘年拜金吾詔未至病卒軍令欲令重政代為將重政與其母徐氏拒不從獲免故寵之

七月贈故忠州別駕陸贄兵部尚書故道州刺史陽城左散騎掌侍仍賜其家錢二百千令所在州縣給遽以喪葬

册府元龜

册府元龜

淮南李嗣京叅閱

西極文翔鳳訂正

豫章黃國琦較釋

帝王部 一百四十

旌表第四

唐憲宗元和元年十二月贈故嘉州刺史崔佐時大理卿佐時為西川留後劉闢所殺故也

二年七月詔曰王者旌表通乎異代况音徽未遠名迹可尋風流所傳弊俗興起舉其遺直足勸事君故

朝議大夫守給事中襲南陽郡公袁高茂功之後清德冠時貞元初職在論駁嘗執謹議封還詔書居平蹈嘗則汎然而無忤會節有立皆卓爾而難踰故能望重朝端行滿天下未踰大任遽歿中身德之不忘久而彌著朕方弘景化寤寐前良用旌尚德之懷俾申加等之贈哀榮所被勸獎斯存可贈禮部尚書高貞元初抗論盧杞中外相賀數正直者以高爲第一李吉甫爲相備陳其事始下詔贈

十月潤州李錡平制曰王澹趙琦等仗節死義殺身成仁無罪無辜受茲殘酷所宜褒表以勸忠貞即加追贈仍令州府致祭收葬其王澹如有子弟服滿日與一子八品正員官如更無辜受戮及斃身故順者亦委李元素具事跡聞奏當有褒贈及加甄錄如受戮之中有長行官徒勿停糧賜優給其家初澹爲錡判官及錡言歸闕署爲留後錡旣無行意尋托疾屢改發期澹與中使頻諭之錡不悅澹旣摠留務或有制置錡益不能平潛諷親兵令殺澹者數矣因散冬衣澹入謁錡兵士數百人持刃拽於階下齎食之監軍聞亂遣衙官趙錡慰諭又齎食之及錡敗故有詔贈

三年二月贈故布衣崔善貞睦州司馬旌忠諫也初李錡鎮浙西恃恩驕恣善貞詣闕上封言錡罪狀德宗械送錡錡坑殺之錡敗贈官

五年正月贈故左神策軍大將軍陽山郡王酈定進兵部尚書賻布米粟有差定進時號勇將嘗征蜀有功及討王承宗力戰陣敗馳歸馬倒賊識曰酈王也遂爲所害官軍爲之喪氣繇是褒贈

四月睦州上言州人方良琨六代同居請表其門閭從之

五月贈故昭義軍將曹公父左金吾衛大將軍公父母鄭氏封武威郡太夫人仍賜錢三十萬先是謀於盧從史公父參之倉卒爲亂兵所害故加贈而又褒封其母焉

六月丁亥贈故禮部尚書鄭叔矩太嘗卿贈故朔方河中副元帥判官簡較戶部郎中兼侍御史路泌絳州刺史仍各賜其家絹二百匹至葬日委所在州府量給助喪事泌爲渾瑊從事貞元三年隨瑊與吐蕃會盟而陷旣在絕域棲心於釋氏之教爲贊普所重待以賓禮貞元十九年吐蕃遣邊將書求和少子隨哀泣䟽陳願允其請表三上德宗命中使諭旨以朝

廷懲其宿詐使更要於後信迄數歲不報及帝卽位前年蕃使復款塞隨五獻章上陳又投書哀訴於宰相裴垙李藩皆協力爲奏言帝允之命徐復等報聘乃特於荅詔疏名氏令以歸中國吐藩因復等還遣使來朝遂以泌及淑矩之喪與銘及遺錄至朝野傷歎帝憫之命贈賻焉

六年二月浙江西道觀察使以前集賢殿校書郎丁公著孝行聞詔日丁公著辭官侍親不顧榮利高行至性人倫所稱今執喪致毀又聞過禮其所請旌表門閭官依仍委本州刺史親自慰問并量給粟帛

三月甲子贈故金吾衛張克讓尚書右僕射克讓茂昭長男也前爲易定將木力溝之捷克讓有功焉十年十二月贈故雋州刺史陳孝陽洪州大都督旌善狀也

八年四月贈故左神策軍兵馬使嚴奉刑部尚書追平蜀之功也

七月以蜀將郝同美爲黎州刺史褒其節也同美元和初以劉闢之衆歸而闢屠其家故旌寵之

十二月勅張茂昭立功河朔舉族歸朝義烈之風史冊攸載或聞身歿之後家無餘財追懷舊勲特越嘗

典宜每年賜其家絹二千疋春秋二時給付

元年閏八月詔曰存樹風節謂之立名歿加褒飾所以勸善故朝散大夫試秘書省著作郎兼侍御史甄濟昔以文雅見稱當時嘗因辟召亦佐戎府而能保堅貞之正性以履危機覩逆亂之潛萌不從裔汙義聲可傳於竹帛顯贈未賁於松楸藩方上陳允叶夔典追加命秩尚服殊榮可贈秘書少監濟初爲安祿山范陽掌書記天寶十三年濟察祿山有異圖謀以智免以衛縣令齊玘誠信可托乃求使至衛縣具以誠告令弟澄密求羊血以爲備至夜僞嘔血疾不能

支遂昇歸及祿山反使僞節度使蔡希德令行戮者李揆等二人封刀來召察詐不起卽就戮之濟以左手書云不得李揆持刀而前濟引首以待希德歔歔嗟嘆李揆等退以實病報後慶緒繼逆又使郡縣強昇至東都安國觀經月餘代宗統師收東都濟起詣軍門表送上都肅宗館于三司使臣於賊者瞻望以愧其心尋授秘書郎轉太子舍人竇應初拜刑部員外郎因蕃寇逃難客於襄州大曆中江西觀察使魏少遊奏授著作郎兼侍御史充莫徭副使終於襄州至是山南東道節度使袁滋奏其節操與權皋同科



合載國史勅甄濟頃逢屯難不受染汙風塵之內名迹獨全宜付史館旋又下制褒贈焉

是月又詔曰孝子劉敦儒生於儒門稟此至性王祥篤行起孝敬而不移曾參養志積歲年而罔怠用弘勸獎宜服官葺分曹維司俾遂私志可守右龍武軍兵曹參軍分司東都敦儒子玄之曾孫母終居喪致毀維中謂之劉孝子權德輿留守東都表其志行故授以官

十月魏州湖城縣百姓閻昭五代同居命旌表之十年四月贈工部尚書致仕高彥昭陝府都督如有

子孫委中書門下服闋後量材叙用彥昭不知何許人初事李正己及李納叛彥昭以濮州降于河南都統劉玄佐納怒殺其妻子有女九歲初見其母幾將就害拜天而祝女問其故荅曰以天之神明將有祈也女曰天如神明豈使吾效順而族戮也如其無知即又何拜獨不拜而死帝聞詔下太嘗謚曰愍女當時文士屬詞以誄之

十一月贈故壽州死難之將張抱劍劉榮周和等刺史仍以米粟給其家

臣欽若等曰時討淮西吳元濟抱劍等死王事也

十一年正月贈故成德軍節度掌書記殿中待御史

李序工部郎中序安平人百藥五代孫舉進士嘗謁  
王士貞署為掌書記士貞死序後以他事忤承宗被  
殺故加贈

四月山南東道故大將軍李仲暮呂中庸石鍾黃士  
榮等以死難皆贈刺史

時諸道之師討鎮  
州王承宗故也

五月山南東道故將南珍擘等十六人忠武軍故將  
喬錡等三人河東故將徐宙等二人並以死難贈刺

史 亦以鎮州  
用師故也

十二年三月贈故冀州刺史正怡尚書左僕射仍令  
存訪親族授以封爵怡武俊從子以戰功歷深冀趙

二州刺史承宗之叛怡守南宮縣以當王師及王士  
則為邢州刺史怡誠款通之及士則去邢州怡情頗  
洩於賊遂遇害并屠其家怡男元伯先潛來京師過  
定州張茂昭知而留之於是授監察御史委茂昭軍  
中任使

七月昭義故將衛重興等三十二人以死難並贈刺  
史 鎮州用  
師也

十一月以楊元卿為左金吾將軍元卿以淮西從事  
歸朝其妻及男五人皆為賊所害及賊平朝廷方驗  
其事命中使至宅為發哀故有此授

十四年四月詔曰圖難忘死爲臣之峻節顯忠旌善有國之令猷日者妖豎反覆侮我朝章而濮州刺史高沐刼在兇威潛輸忠款諷其不庭之咎將異革心數其煮海之饒聿求利國伏奏必陳其逆節漏師嘗破其陰謀竟以盜憎遂死王事歿而不朽風聲凜然式表漏泉之澤且彰勁草之節可贈吏部尚書仍委馬摠訪其遺骸以禮收葬優恤其家如有子孫具名聞奏沐爲李師古判官師道擅襲每謀不順沐廣引古今成敗諭之前後說師道爲善者數千言判官李文會等構於師道沐遂遇害

九月贈淄州刺史張頌左散騎常侍登州刺史高曙右散騎常侍萊州刺史李廷遠洪州都督萊州長史蔡成鄆州左司馬尚振交州長史沈皆並贈刺史皆以嘗謀殺李師道歸國爲師道所害故也  
李湍妻湍吳元濟之軍人也元和中淮西未平湍心懷向順乃忽渡澗河來降烏重裔其妻遽爲賊束縛在樹齧而食之至死呼其夫曰善事烏僕射觀者義之至是烏以其事請列於史策十三年憲宗下詔從之

董昌齡母楊氏昌齡嘗爲泗州長史世居於蔡少孤

受訓於母累事吳少誠少陽至元濟時爲吳房令楊氏潛誠日逆順之禮成敗可知汝宜圖之昌齡志未果元濟又署爲郾城令楊氏復誠日逆黨欺天天所不福汝當速降無以前敗爲慮無以老母爲念汝爲忠臣吾雖歿無恨矣及王師逼郾城昌齡乃以城降且說賊將鄧懷令歸欵於李光顏憲宗聞之喜急召昌齡至闕真授郾城令兼監察御史仍賜緋魚昌齡泣謝日皆老母之訓憲宗嗟嘆良久元濟囚楊氏欲殺之而止者數矣蔡平楊氏幸無恙元和十五年陳許節度使李遜疏楊氏之強明節義以聞乃封北平

郡太君

孝女王和子者徐州人其父及兄爲防秋卒戍涇州元和中吐蕃寇邊父兄戰死無子母先亡和子時年方十七聞父兄歿於邊上被髮徒跣裳獨往涇州乞取父兄之喪歸徐營葬手植松柏剪髮壞形廬於墓所節度使王智興以狀聞詔旌表之

穆宗長慶元年正月以前坊州刺史班肅爲司封員外郎時宰臣上言日將欲清風俗必在厚人倫竊見皇甫鑄權位盛時班行之中多所親附及得罪後議論立變增嫉如讐俗之衰薄一至於此唯班肅以曾

為郎官判度支案終始如一獨送山城周行之間多  
美其事今郎秩已罷望授一省官以表其行故有是  
拜

是月河陽奏百姓劉士緝母疾割股肉以奉母請表

門閭從之

議者以神農記辯藥物凡陸行泉游草伏木棲金石之夥荒裔之產可攻於疾者無

不悉載未嘗言人之騰膺可以愈疾及開元末有明

州城門山里人陳藏器著本草拾遺云人騰至海疾

自後閭闔相倣

自殘徃徃而有

二年正月詔曰故魏博等州節度觀察處置等使起  
復寧遠將軍簡較工部尚書兼魏州大都督府長史  
御史大夫賜紫金魚袋田布朕以寡昧臨御萬邦威

刑不能弭干紀之變道化不能馴多僻之俗致使上  
公罹禍田氏積寃爰整旅以徂征每終食而三歎自  
茲弔伐驟涉寒暄雖良將銳師皆云協力而俟時觀  
釁未即齊驅嗟我誠臣結其哀憤引遷延之咎以自  
刻責奮決烈之志以謝君親白刃貫於肝心鴻毛喻  
其生死忠臣孝子一舉兩全晉稱卞氏之門漢表尸  
鄉之節比方於布今古為隣况其臨命湏臾處之不  
撓載形章表益見深衷間使發函悼心疾首從先臣  
於厚載爾則無愧觀遺像於麟閣予何可堪端揆崇  
名職喪瘞典匪以為報聊摠永懷可尚書右僕射賻

布三百段米粟二百石

六月乙酉詔曰田布頃因戎旅發憤自裁言念忠誠  
豈忘贍卹宜賜錢一千貫絹一千疋以充葬用

九月贈汴州故將郭昌晏禮部尚書昌晏前欲密謀  
誅留後李齊以其謀通於韓克

臣欽若等曰李齊卞  
守將逐其帥李厚自  
為留後韓克  
弘之弟也

事洩被害故加寵贈

三年十月以潞州左司馬賈直言為諫議大夫直言  
以孝聞人稱其代父飲醪救得不死而手足枯陷於  
鄆州累有忠言激李師道不聽亦不忍殺

敬宗寶曆元年六月虢州刺史陸亘上言玉城縣百

姓聞鄧五代同居請旌其門閭兼追贈鄧五代祖庭  
訓一官從之

文宗以寶曆二年即位賜劉克明母錢一千貫絹五  
百疋婢二人以其不從克明為亂賞之也

太和二年九月詔曰見危致命之死不顧處其義則  
白亦可蹈得其所則鴻毛猶輕此忠臣烈士所以垂  
名不朽者也故棣州刺史克本州鎮邊兵馬使樂濛  
稟受正氣發揮壯猷屬逆豎亂黨反形潛具濛於此  
時密獻成策朕且欲諭以文告革其非心重難興師  
因寢其奏而沉謀中泄遘茲深寃眷言此心傷恨何

已可贈工部尚書仍許歸葬上樞令所在路次州縣  
供熟食兼通夫等應緣葬事所須並令官給賊平之  
後仍訪其子孫親屬

三年六月錄諸道戰歿大將並贈以官

四年正月故東州將李載等九人並加褒贈歿於蠻  
寇故也

六年九月賜故幽州觀察判官攝監察御史常雍妻  
蕭氏蘭陵縣君雍故太子賓客張弘靖在幽州日所  
署判官當是時屬朝廷制置未備幽州俗本兇悍尤  
不樂文儒爲主帥賓佐習於嘗態忘其變通議論不

密卒然起亂雍時家亦從劫暴蕭氏聞難號呼專執  
夫袂左右格云以死不從及雍臨刃蕭氏涕而告曰  
妾不幸年少義不苟活今日之事願先就死執刃者  
斷其臂詞氣不撓雖兇悍圍視無不傷歎其父蕭氏  
亦卒幽州節度使楊志誠表明其事故追封焉

十月山南東道觀察使奏郢州長壽縣竟陵鄉村山  
孝子史傳年齒尚幼母亡廬墓被髮泣血誓志終身  
詔表其門閭

十二月宣州觀察使沈傳師奏涇縣遊道鄉百姓萬  
晏自高祖額至仲芳五代同居詔表其門閭

七年三月壬子浙江東道奏越州蕭山縣百姓李涓幼失父母與兄二人同居兄病涓割股療之因差後兩兄俱死奉寡嫂孤姪二十餘年衣食無偏莊田租稅涓自主辦資財筦鑰寡嫂掌之孤姪婦孫其三十人其家生芝草請旌表從之

開成元年贈太尉段秀實子太僕卿伯倫卒宰臣李石奏曰伯倫秀實之子自古沒身以利社稷者無如秀實之賢帝憫然曰伯倫宜加賻賜仍輟朝一日以禮忠臣之嗣

二月丙戌詔曰故邕州都督府錄事參軍衛方厚妻

程氏乃者吏爲不道害殺爾夫詣闕申冤徒步萬里崎嶇偏畏濱於危亡血誠旣昭幽憤果雪雖古之烈婦何以加焉如聞孤孀無依晝哭待盡俾榮祿養仍錫疏封可武昌縣君仍賜一子九品正員官方厚爲董昌齡所殺程氏知其夫爲昌齡所害力不能克遂抑其哀如非冤者昌齡雅不疑聽其歸喪故得以徒行詣闕帝因諫官論昌齡不宜爲郡再譴昌齡遂有此命

是月以鹽鐵宣歙院官簡較膳部員外郎顏從覽爲主客員外郎贈太師顏真卿曾孫弘式爲同州參軍



詔曰朕每覽國史見忠烈之臣未嘗不嗟歎久之思  
有以報如聞從覽弘式實杲卿真卿之孫永惟九原  
既不可作旌其嗣續諒叶典彝考績已深於宦途者  
命列於中臺官次未齒於縉紳者俾佐於左輔庶使  
天下再新義風  
三年十一月甲戌戶部侍郎李珣奏廬州舒城縣太  
平鄉百姓徐行周叔伯兄弟五代同居請免其同籍  
戶稅從之  
十二月宣歙觀察使崔鄴奏溧陽縣百姓陳珽五代  
同爨請蠲除賦稅旌表門閭從之

四年十二月贈故易定觀察判官兼侍御史李士季  
給事中其家委韓威安存喪事官給仍賜一子官待  
服闋日具名聞奏士季爲易定節度張璠從事璠卒  
之初士季知留務三軍欲立璠之子元益士季不從  
遂爲亂兵所害至是舉褒贈之典

武宗會昌元年三月贈裴度太師制曰堯之舊臣伯  
益顯庸於舜禹周之元老邵公流美於成康永惟其  
人是屬良相裴度始以謀策除害佐烈祖之中興終  
以忠貞立朝毗累聖之鴻業經緯之志華皓不衰功  
勳爛然圖史輝煥姦邪所忌軌軌于時豎氛霧旣開

魚水將協條風孰見其喜溫零雨皆美其來歸未踐  
明庭遽嬰沉痾威鳳莫翔於舊沼虛舟長往於夜川  
殂謝之初朋黨異議贈典不稱人情鬱然屬告顛上  
玄渙流大號載懷先正宜有褒稱寵既及於維師恩  
有加於在昔豈必望鄴侯之壘方念茂功過馮道之  
祠乃思遺美以茲爲勸可不務乎

宣宗太中六年六月充海節度使蕭倣奏臣當道先  
差赴慶州行營陣歿押官鄭神佐在室女年二十四  
先亡父未行營已前許嫁與右驍雄將官健李玄慶  
並未受財禮阿鄭知父神佐陣歿遂與李玄慶休親

戴髮壞形自往慶州北淮安鎮收亡父遺骸到交州  
瑕丘縣與亡母合葬訖便於塋內廬墓手植松栢誓不  
適人伏以閭里之中罕知禮教女子之性尤昧義方  
阿鄭痛結窮泉哀深陟岵投身砒磧收父遺骸遠自  
邊陲得還閭里感蓼莪以起恨侍丘墓以誓心此皆  
陛下孝理弘深德風煦被遂變獷野之性潛知禮義  
之方求之古人斯爲烈女臣倣忝廉察敢不上聞伏望  
天恩宣下有司特賜旌表仍放本戶兩稅以彰至行  
勅旨宜依

懿宗咸通三年正月壽州奏裨將何武討賊死於盛

唐縣詔贈簡較左散騎嘗侍制日地連山藪境有逋  
逃武能首率郡兵身歿王事既嘉忠蓋宜示褒贈不  
能慰彼漏泉將亦激其群較以本氏所封以薄至  
鄭畋為鳳翔節度使簡較司空同中書門下平章事  
卒昭宗册贈司徒謚日文昭初李茂貞表曰臣聞有  
勲不廢前代格言無美不稱先王令典是垂休於國  
牒將行示於孫謀其有漢閣元勲岐山茂政霜露已  
彫於大樹蓬蒿將沒於豐碑歎泉扃而緝禮未加顧  
潘翰而清風盡在是敢敷陳往事啓建前功庶雅頌  
而重興異徽猷而復舉臣伏見故鳳翔尹同中書門

下平章事鄭畋瑞應星精祥開日角建洪鑪於聖代  
成庶類於明時鳳毛方浴於春池龍節忽移於右輔  
旋於群鷗聚噪方蝟攢鋒蒼黃而玉輦省方次第而  
金門撤鑱九州相望初猶豫以從風百辟無歸半狐  
疑而委質鄭畋莖冠豎髮褒袖運籌羅將較於帳前  
列貔貅於麾下乃言曰封豕肆兇長鯨噴毒冥生靈  
於塗燼委神器於腥羶我國家時運雖艱天曆方遠  
豈可以大朝簪綬當屈節於豺狼近甸藩籬欲輸誠  
於虺蜥繇是理性誓衆釁鼓出師飛羽檄於四方會  
諸侯於萬里擎廻地軸決驚波而盡入東溟抽轉天

關驅列宿而咸尊北帝雷喧鼙鼓山轟旌旗五兵纔  
入犬牙一陣盡塗龍尾值大憝建瓴之勢在元臣反  
掌之間不意天柱朝摧將星夜殞竹帛徒懸於皎日  
衣冠已隔於佳城始舉義師爰從指顧稟三令五申  
之訓職囊沙滅竈之謀今則謬以微功叨居重鎮仰  
高蹤而如在念遺烈而未書伏乞皇帝陛下顯舉舊  
勲榮加盛禮俯盡褒酬之典遐追鎔範之功俾四海  
有聞致九泉無恨時朝廷覽表方有是贈

哀帝天祐元年十月郢州節度使雷彥恭奏楚大夫  
屈原廟在當道請賜封崇勅曰楚三閭大夫屈原正

直事君文章飾已當椒蘭之是佞俾蕙菴之不香顯  
比干之赤心躡彭咸於綠水雖楚煙荆雨隨強魄於  
故鄉而福善禍淫播明靈於巨屏各早流於竹素功  
有益於州閭爰表厥封用旌良美宜封爲昭靈侯  
後唐莊宗同光二年四月卽位於魏州下制曰應有  
奉使危邦罹殃殊域旣遭陷害深可憫傷如伊鐔蓋  
富戴漢超李承勳之徒仰所司具名錄奏朝廷必議  
褒贈

十月平汴州詔有交鋒戰陣沒於王事未經追贈各  
與贈官

二年三月安義李存霸奏屯留縣坊市百姓韓德兄弟累世同居母死割乳以祭廬於墓側累年種瓜合歡同蒂旌表之

明宗天成二年十一月勅太宗朝僕射李靖贈太保

鄭州僕射陂改為太保坡

此坡蓋後魏時賜僕射李冲今云李靖非也

三年九月密州上言輔唐縣民華延福事父母有至孝之行旌表之

十一月詔賜故夔州節度使西方鄴男錢絹各五百貫疋布一百疋米麥共二百石以父沒王事故也

夏魯奇天成四年鎮遂州軍府將吏上言以節度使

到任已來有善政七條以安百姓奏勅魯奇宣力兩朝統戎三鎮居富庶之地無奢侈之心上為國家下安生聚每行公道全塞倖門儻非大治人情詎致遠聞余聽有茲為作宜示褒稱仍下諸州令各知悉時孟知祥董璋據有兩川魯奇僻居南鄙董璋之叛與知祥攻遂州旬月援路斷絕兵盡食窮勢知必屈乃自刎而卒上以其盡節王事聞其死也慟哭久之給其家錢百萬絹千疋粟麥等贈太師封齊國公長興元年正月賜故靈武行營馬軍指揮使邢彥洪男恩進錢絹米麥以其父歿王事故也

十二月邢州奏光山彭爽四世義居乞改鄉里名號

從之  
已未滄州乾符縣人張楚立乾寧五年割股治母病  
母卒割心瀝血祭辮髮跣足廬於墓所三十年勅旨

以其鄉為孝友鄉和順里

二年九月登州黃縣人苗珣四世義居宜改為和孝

鄉邕順里

十月棣州渤海縣人邢釗四世義居旌表門閭

四年正月丙戌磁州武安縣崇禮鄉萬善里人馬肇

三世義居旌表門閭仍改崇禮鄉為崇孝鄉萬善里

為和慶里

九月壽州奏登州黃縣累世義居人王義雲下所司

旌表門閭

所司初言自喪亂已來亡失旌表式樣令式雖載條目別無制度時有明經生王守

誠者即義雲之孫自言累代義居今鄉里尚有載初

元年旌表門閭見在載初中奏臣遠祖六代同居有

白雀嘉禾之瑞其旌表門閭樣請下本州簡驗以聞

即召房知溫遣畫工至王義雲鄉里畫門閭以進所

司方得

安行

未帝清泰二年七月鎮州元氏縣文成鄉七義里民

曹重興七世義居孝義聞於鄉黨詔文成鄉改為仁

孝鄉七義里改為旌義里仍委本道依令式旌表門

閭其曹重興宜令授本府不赴任文參

十月晉州臨汾縣平陽鄉聖泉里民宗連同縣原隰鄉百社里民劉環累世同居義聞州里詔改平陽鄉聖泉里爲敦俗鄉崇仁里劉環改爲廣孝鄉永和里仍委本道版署文參之名

晉高祖天福元年閏十一月壬午勅應自起義已來或盡節捐軀歿於王事宜加褒贈兼恤妻孥俾義激於忠貞庶恩霑於幽顯

二年四月丁亥制曰遇滎陽而因思紀信屆夷門而尚想侯嬴著高義者猶足歎嘉蹈忠節者固宜旌賞事資激勸恩在褒揚梁故滑州節度使王彥章効命

當時致身所事稟千年之正氣流百代之令名宜令超贈太師子孫量才叙錄

六月宗正卿石光贊奏昔周武王奄有天下過商容之間必式見比干之墓卽封蓋褒賞賢良尊崇忠義伏惟皇帝陛下顯膺天命開創鴻圖解網行仁救時順動樂業不知於帝力悅隨但聽於山呼盛德難名太平可待臣伏見滎陽道左有萬石君廟本前漢大中大夫石奮之廟奮有子四人各二千石祿景帝曰人臣尊寵畢集其門故號萬石君德行懿績備列前書唐大中十三年鄭州司馬石貫稱裔孫刊石廟廷

備紀其事伏遇皇帝行幸浚郊經過滎水展義已聞於岐路覃恩宣布於幽明其萬石君廟伏乞俯弘霽澤特降封崇俾光遠祖之徽猷益茂我朝之盛典勅漢大中大夫石奮德盛軒裳道光簡素享萬石休明之祿成一門忠孝之名彰茂實於前脩契興隆於景運宗正卿石光贊特上章疏欲示封崇與表深原式昭豐祚宜贈太傅

七月詔曰東都奏留守判官監左藏庫李遐當張從賓作亂之際遣李彥珣強取錢帛李遐稱不奉詔旨安敢從命尋遇害朕以李遐讀古人書持君子行政

苦食淡承家不墜於素風激濁揚清歷宦咸推於貞操一昨叛臣猖獗兇黨憑陵而能守正不回臨難無懼忘身殉節雖死猶生若無優異渥恩何以光揚忠烈仍聞母老子幼鄉遠家貧宜超贈於華資兼賞延於嫡嗣是覃漏澤慰彼沈寃可贈右諫議大夫其母田氏封京兆郡太君所有子孫候服闋日量才叙錄朝廷雖已特支救援錢帛粟麥其本官贖贈物色宜依舊例指揮仍長給遐在生官俸祿終母一世噫朕以薄德屬茲多難致害忠良實多軫惻以子之俸終母之年用表盡傷俾慰存歿布告中外當體朕懷



是月又以東頭供奉官王思勳前齎詔撫諭河陽爲張從賓所害制曰思勳早承家蔭久列內廷奉王命而不辭顧賊衆而無懼宣揚朝旨勸諭兵師遂被兇徒橫加殺害而聞厥父抱疾其家甚貧不有旌酬何彰忠烈可贈左武衛大將軍仍以恩勳舊請俸祿終王元正一世思勳男候有長成者量才叙錄兼令所司厚給賻贈噫以子之俸終父之年足表渥恩以慰存歿布告中外咸使聞知

四年正月尚書戶部奏深州司功參軍李自倫六世義居奉勅准格處分按格勅節文孝義旌表苟存虛

濫不可褒稱必在累世同居一門和睦尊卑有序財食無私遐邇欽承鄉閭推伏州縣親加按驗狀迹殊尤簡覆既同准令申舉方得旌表當司當本州審到鄉老呈言等自倫高祖訓訓生燦燦生財財生忠忠生自倫自倫生光厚六從弟兄同居不妄勅以所居飛鳧鄉爲孝義鄉孕聖里爲仁和里仍准式旌表門閭自倫委吏部以本道一官注擬

閏七月丙子尚書戶部奏李自倫義

居六世准勅旌表門閭先有登州義門王仲昭六代同居其旌表府廳事步欄前列屏樹烏頭正門閭闊一丈二尺二柱相去一丈柱端安瓦楠墨染号烏頭築雙關一丈在烏頭之南三丈七尺去街十有五步棧柳成列今舉此爲例則令式不該勅曰仲昭正廳烏頭門等事不載令文又無勅命既非故事難瀆大

倫凡創業之朝求理是務靜執守嘗之本動為經久之期志在普勸人情永孚王化據自倫之家所立實擢時風依仲昭之語便行何成世範至於問古官於劄子得墜典于伏生以昔方今彼與此異宜從令式只表門間於李自倫所居之前量地之宜高其外門人安集襍門外左右各建一臺高一丈二尺廣狹方正稱臺之形坊以白泥四隅染赤其行列樹鎮隨其事方使不孝者見以悅心不義者聞而易行豈獨榮於趙國實亦光於晉朝廣訓黔黎永標青史其同籍課役一准今文

十月故房州刺史李廷誥贈太保張從賓虎牢之亂沒于王事故也

十二月丁未趙郡民曹典義居七世表其門閭

五年七月己巳詔曰故銀青光祿大夫簡較左散騎

嘗侍兼御史大夫賈仁詔頃自內廷出為外職李金

全愚冥而猜息胡漢筠邪佞而貪殘竟罹塗地之殃

誠堪歎息爰示漏泉之澤用表褒崇必有貞魂欽茲

茂典可贈右衛將軍又曰故安州馬步軍副都指揮

使桑千威和指揮使王萬金成彥溫等皆精武略威

著軍功或列偏裨或嘗屯戍當姦臣之叛國或執節

不從全烈士之徇名或術窅而死實興永歎宜示追

崇或列部符或并環衛賁諸幽壤彰彼明誠千可贈

峽州刺史萬金可贈左監門衛將軍彥溫可贈左千

牛衛將軍

八月辛亥磁州武安民郝平義居五世改所居武成

鄉爲興孝鄉崇福里爲光和里仍旌表其門閭

六年十月壬寅詔曰唐室中興賢臣挺生凜然英風  
迥冠千古不有典冊曷旌忠良唐梁國公狄仁傑稟  
五行正氣聳九諫直操鸞祚危而復安黔庶否而獲  
泰惠流河北名振寰中惟爾事君無愧臣節用光遺  
像式示明恩筠簡賽函著周官之貴位貞魂英爽煥  
魏土之靈祠韶是寵嘉永光緹素可追贈太師仍令  
所司擇日備禮册命

七年閏三月辛丑旌表陳州西華縣人張厚門閭仍  
改禮教鄉爲孝義鄉株林里爲和順里厚家四十餘

口五世聚居家門雍睦鄉黨稱之本州以聞故有是  
命

六月戊午勅故襄州元隨都押衙王令謙贈忠州刺  
史押衙潘知麟贈順州刺史令謙與知麟早事節度  
使安從進歷數鎮從進臨漢上所爲多不法令謙知  
麟每諫之及萌逆節數形謹言會從進子弘超自宮  
苑副使省父至郡郡有山寺弘超率令謙登賞酒醢  
臨峭壁使人推落誣云令謙因醉墮崖而死皆從進  
之意也知麟相次遇害朝廷聞其事故有贈與旌其  
忠也時詔旨仍委高行周候收復城池訪覓兩家骨

肉切加安撫具以名聞當與叙錄潘知麟本貫陝州  
薰下本處如有親的骨肉亦仰錄奏

少帝開運元年勅曰故淄州刺史翟進宗不穀不德  
營兵叛予陷爾厲階力屈遇害念茲忠率實用盡傷

蜀主恕其黃權魯繆誅其卜國皆非罪也吾將贈之  
用慰貞魂宜頒漏澤可贈左武衛上將軍

曹敏蔡州汝陽縣荆河鄉蘇村人數世義居鄉人耿  
温等五十五人論奏請加旌表勅旨荆河鄉宜改爲

孝義鄉費鄭里改爲仁和里  
三年勅孟州奏河陰縣版籍鄉謝明里義居百姓王

均宜改版籍鄉爲孝悌鄉謝明里爲積慶里餘准格

文處分

漢隱帝乾祐三年春汝州防禦使劉審交卒汝爲近

輔號爲難治審交盡去煩弊無擾於民百姓歌之及  
卒郡人聚哭於柩所列狀乞留塋本州界立碑起祠

以時致祭本州以聞詔曰朝廷之制皆有舊章牧守  
宰官比無贈典其或政能殊異惠及蒸黎生有令名

效留還愛褒賢獎善豈限彝章可贈太尉吏部所請  
宜依

周太祖廣順元年八月契丹遣幽州教練使曹繼筠

護送趙瑩喪柩至其家制曰禮云利祿先死者而後生者則民不悖先亡者後存者則民可以託聖人垂訓與我同心因嗟既沒之賢俾舉追崇之典晉故中書令趙瑩行高言善性達心平鼎號函牛斯爲重器劔稱斬馬可謂靈鋒遺清白於子孫行忠信於蠻貊斷魂外境歸骨中華於是盡傷載深軫悼俾贈三師之秩以伸一去之悲可贈太傅

二年三月乙丑故控鶴指揮使郭超贈鎮海軍節度使超從曹英攻兗州用命中流矢而卒

四月乙未供奉官蓋繼明自樂壽來言齊州兵作亂之日只有鎮州雄勝都頭楊肇十將李鐸二人部署兵士登城守禦遂保安城池詔褒之

五月太祖平兗州乃下勅曰闡弘魯崔周度死義之臣禮加二等所以滲漏澤而賁黃泉也爾等貞節昭彰正容肅厲以從順爲己任以立義作身謀履此禍機併罹寬橫宜伸贈典以慰貞魂弘魯贈驍衛大將軍周度贈秘書少監

六月壬子以故虎捷左第三都指揮使景進贈靜江軍節度使故虎捷第七都指揮使杜珣贈武清軍節度使皆軍興兗州時沒于王事也

三年五月戶部言濟州金鄉縣民索修已陳州項城縣民嘗真皆散髮跣足守墳本州以聞戶部以赦書節文孝子義夫所宜旌表以厚時風勅宜依令文施行

顯德元年正月丙子朔赦文自開創已來諸軍將較死王事者軍使都頭已上並與追贈已追贈者更追贈有親嫡子孫量才錄用

世宗以顯德元年正月丙申卽位三月詔諸軍將較自開創已來有歿於戰陣及身死疆場者並與追贈如有親嫡子孫未曾錄用者並與錄用

七月辛卯制曰故輸忠効戴功臣鎮國軍節度華商等州觀察處置等使兼河東道行營先鋒都指揮使簡較太保史彥超嚴能齊衆武可推兇振鐸號軍伸其膽勇登鋒捍寇誓以身先一昨北戎咀兵同惡相濟爾乃力排群醜體中重瘡雖虜騎已大奔而將軍之先歿祗金革而剛強已矣聽鼓鼙而傷歎如何言念純臣宜膺褒美俾追贈於崇秩用報慰於重泉可贈簡較太師

三年二月庚辰贈故右金吾衛將軍蕭處仁漢州防禦使處仁晉漢之間繇通事舍人歷閣門客省之職

而昇於環衛繼護兵於外頗有聲望帝率兵渡淮以爲先鋒兵馬都監攻陷滁州日爲流矢所中而卒以其歿于王事故優其贈典

九月庚寅朔辛卯贈故濟州刺史李實睦州防禦使贈故蘄州刺史解行德明州防禦使贈故引進使王演太府卿皆以淮甸之役歿於王事故也

六年贈故華州節度使史彥超爲太師先是大軍至河東城下契丹營於忻代之間遙應賊勢詔天雄軍節度使符彥卿率諸將屯忻州以拒之彥卿襲契丹於忻口彥超以先鋒軍追蕃寇離大軍稍遠賊兵伏發爲賊所陷世宗痛惜久之故有是命

冊府元龜

冊府元龜 帝王部

